

28-bob. Familiya, ism va ota ismini o'zgartirish

Qarang: O'zbekiston Respublikasi Vazirlar Mahkamasining 2016-yil 14-noyabrdagi 387-sonli qarori bilan tasdiqlangan "Fuqarolik holati dalolatnomalarini qayd etish qoidalari"ning X bobi ("Familiya, ism va ota ismini o'zgartirish").

226-modda. Familiya, ism va ota ismini o'zgartirish haqidagi arizalarni ko'rib chiqish tartibi

Familiya, ism va ota ismini o'zgartirish haqidagi arizalar ariza beruvchi o'n olti yoshga to'lgandan keyin u yashab turgan joydagi fuqarolik holati dalolatnomalarini yozish organi tomonidan ko'rib chiqiladi.

Familiya, ism va ota ismini o'zgartirish to'g'risidagi xulosa ichki ishlar organlari tomonidan ushbu shaxs tegishli tekshiruvdan o'tkazilgandan keyingina tuzilishi mumkin.

Fuqarolik holati dalolatnomalarini yozish organining familiya, ism va ota ismini o'zgartirishni rad etganligi ustidan sud tartibida shikoyat qilinishi mumkin.

Qarang: O'zbekiston Respublikasining Ma'muriy sud ishlarini yuritish to'g'risidagi kodeksi 27-moddasi birinchi qismi 4-bandi.

227-modda. Familiya, ism va ota ismini o'zgartirish oqibatlari

Familiya, ism va ota ismi o'zgartirilganda fuqarolik holati dalolatnomalarini yozish organi fuqarolik holati dalolatnomalarini qayd etish daftarlari yozuvlariga tegishli o'zgartirishlar kiritadi.

Er (xotin)ning familiyasi o'zgartirilishi (unga nisbatan otalik belgilanganda ham) xotin (er)ning hamda uning voyaga yetgan bolalari familiyasini o'zgartirishga sabab bo'lmaydi.

Ota-ona har ikkalasining familiyasi o'zgartirilganda ularning o'n olti yoshga to'lmagan bolalari familiyasi ham o'zgartiriladi.

Agar ota-onadan biri o'z familiyasini o'zgartirsa, ularning o'n olti yoshga to'lmagan bolalari familiyasini o'zgartirish masalasi ota-onaning kelishuviga binoan, bunday kelishuv bo'lmaganda esa, vasiylik va homiylik organlari tomonidan hal etiladi.

Ota ismining o'zgartirilishi uning o'n olti yoshga to'lmagan bolalarining ota ismi albatta o'zgartirilishiga sabab bo'ladi.